

TEZAU LITURGIC
27 AUGUST

ACATISTUL
SF. PREOT
IOAN
GAȘKEVICI
DE LA
KORMIANSK



MOSCOVA, 2000



Акафист

святому праведному

Иоанну Кормянскому

Кондак 1

Избранный угодниче Христов, святе праведне Иоанне, от чрева матери на служение Богу избранне и юродивым старцем служителем Церкви Господней предреченне, житием твоим праведником Божиим уподобивыйся, темже и Господь обогати тя даром прозрения и исцеления. Мы же, чада Церкви Православныя, с любовью да зовем ти:
Радуйся, Иоанне пресвитере, чудотворче и целителю.

Икос 1

Ангельские силы на небесе возрадовашася, аки предреченно еще во чреве матери быти тебе служителем Церкви Божией, отче праведне Иоанне. Темже прослави тя Господь в житии твоём славне, даром прозрения обогати тя, источник исцелений содела мощи твоя нетленная. Мы же, ведуще славу Божию в тебе нам являющуюся, да зовем ти с радостию велией:

Радуйся, Церкви Православныя новая похвало,
Радуйся, Царствия Божия небожителю.
Радуйся, даром прозрения одаренный,
Радуйся, даром исцеления обогащенный.
Радуйся, дальняя аки ближняя предвидевый,
Радуйся, волю Божию людям вещавый.
Радуйся, служителем Церкви предреченный,
Радуйся, Богородицею прославленный.
Радуйся, Иоанне пресвитере, чудотворче и
целителю.

Кондак 2

Виде отец твой пресвитер знамение Божие в
рождестве твоём, крещая тя Иоанном нарече в
честь апостола любви, Господу же возгласи
хвалебную песнь со Ангелы: Аллилуиа.

Икос 2

Бысть отрочество твое в храме Покрова
Богородицы проходимое, Ея же теплым
заступничеством и водительством охраняемо,
аки птенец Богу в жертву непорочну
принесенный, тако и ты, Господом
возлюбленный, измлада служити Ему избранне,
похвальную песнь приносим и мы тебе таковую:
Радуйся, Богом измлада избранне,
Радуйся, старцу родителю послушен бывый.
Радуйся, молитвы матери твоея плод добрый

явивый,
Радуйся, житие богоугодное родителей твоих
возлюбивый.
Радуйся, плод молитвы их, аки цвет
расцветший,
Радуйся, надеждо их и веселие.
Радуйся, труды старческие им облегчивый,
Радуйся, старость их упокоивый.
Радуйся, Иоанне пресвитере, чудотворче и
целителю.

Кондак 3

Избра тя Господь на служение славное, видя
души твоя чистоту, постави тя пастырем
Церкви Божией и стадо словесных овец тебе
вручи, да пасеши его со усердием, поя Господу
песнь: Аллилуиа.

Икос 3

Божественная Благодать, немощная врачующая
и оскудевающая восполняющая, восполнися в
тебе, сосуде избранный Духа Святаго, праведне
отче наш Иоанне. Постави ты светильника верху
горы высокия, мы же, видяще дивные дела
Божия, во умилении зовем ти тако:
Радуйся, пресвитере Богом избранне,
Радуйся, светильниче, во тьме века возсиявший.
Радуйся, стадо Христово от волков хищных

упасший,
Радуйся, чада духовныя ко Христу приведый.
Радуйся, пастырю неленостный,
Радуйся, праведному Иоанну Кронштадтскому
подражавый.
Радуйся, духа злобы от стада Христова
отгнавый,
Радуйся, заблудшия овцы взыскавый.
Радуйся, Иоанне пресвитере, чудотворче и
целителю.

Кондак 4

Дивный молитвенник явился еси, отче праведне
Иоанне: не токмо во дни, но и в нощи
предавался еси Господеви в молитве, воспевая
со ангелы Ему хвалебную песнь: Аллилуиа.

Икос 4

Видяще тя щедродателя велия, сирии и вдовицы
притекаху к тебе, отче, ты же одарил еси их
дарами коемуждо на потребу, смерти гладныя
их избавляя, темже и мы молим тя: избави и нас
от глада и нестроения в бытии земнем сем: мы
же благодарно тебе воспоем:
Радуйся, к земным благам пристрастия не
имевый,
Радуйся, вдовицу со чады ея от гладныя смерти
препитавай.

Радуйся, нищих одаривый,
Радуйся, сирых защитивый.
Радуйся, странников приявый,
Радуйся, нагих одеявый.
Радуйся, алчущих и жаждущих утешивый,
Радуйся, яко в темницах и больницах
отверженных посетивый.
Радуйся, Иоанне пресвитере, чудотворче и
целителю.

Кондак 5

Боготочный источник явился еси, отче Иоанне,
силою молитвы твоея бесы отгоняя, болящия
исцеляя, от греха на путь правый заблудшия
наставляя, не остави и нас сирых и убогих, но
твоими молитвами спасаеми, и мы воспоим
хвалебную песнь в Троице славимому Богу:
Аллилуиа.

Икос 5

Видяще подвиги Твоя земная, пресвитере славне
Иоанне, Христос даром исцелений тя одари, да и
мы, ведуще в тебе сосуд силы Божией,
преисполненный всякия цельби и благостыни,
зовем ти сице:
Радуйся, источниче исцелений,
Радуйся, сосуде Богом избранный.
Радуйся, врачевом безмездным уподобивыйся,

Радуйся, белезни неисцельный исцеливый.
Радуйся, врачами оставленных не оставивый,
Радуйся, телу моему здравие даровавый.
Радуйся, прощение грехов моих у Господа
испросивый,
Радуйся, душу мою от сна лени
воздвигнувый.
Радуйся, Иоанне пресвитере, чудотворче и
целителю.

Кондак 6

Хотя уподобиться странникам мира сего в Лавру
Киевскую последовал еси, тамо благословение от
старцев ея приял еси, да житием своим
преподобным подражая, воспеваеши со
печерскими святыми: Аллилуиа.

Икос 6

Новаго неба и новыя земли в обетовании
Христове ожидал еси, да и нас подражати тебе
научил еси: на всяк день Господу угождати, в
молитве неленостно пребывати, в посте не
расслаблятися, в труде плоть умерщвляти и тебе
воспевати:

Радуйся, молитвою небо и землю соединивый,
Радуйся, в видении руце ко Господу
простиравый.
Радуйся, пришествие Богородицы в храме

предвидевый,
Радуйся, храм в честь Покрова Ея соорудити
благословивый.
Радуйся, место строительства его указавый,
Радуйся, со пресвитеры его освятивый.
Радуйся, в нем же место славно себе
уготовавый,
Радуйся, яко и ныне телесем нетленным в нем
почиваеши.
Радуйся, Иоанне пресвитере, чудотворче и
целителю.

Кондак 7

Провозвестник грядущаго испытания явился
еси, земли Российстей слезами и кровию
омытися возвещал еси, слезы теплые пред Лицем
Божиим проливал еси, да сменит Господь гнев
Свой на милость над нами, воспевая Ему
вечную песнь: Аллилуиа.

Икос 7

Егда прииде скорбь на землю нашу, избави тя
Господь сего страшнаго видения, призва тя в
райския обители, ты же завещал еси нам яко к
живому к тебе приходити и мольбы своя
изливати пред тобою. Мы же, исполняя заповедь
твою, во умилении сердца зовем ти тако:
Радуйся, яко нетлением Господь тя прослави,

Радуйся, яко душею пред Творцом предстоиши.
Радуйся, яко телесем с нами пребываеши,
Радуйся, яко скорбем и печалем нашим
внемлещи.

Радуйся, яко отраду божественную нам
подаеши,

Радуйся, яко и воздыхание наше слышиши.

Радуйся, яко радованию нашему сорадуешься,

Радуйся, яко чад своих не оставляеши.

Радуйся, Иоанне пресвитере, чудотворче и
целителю.

Кондак 8

Дивно прослави Господь телесе твое, праведне
отче наш Иоанне. Гроб твой тлению земли не
предадешся и телесе твое, яко адамант
драгоценный, в нем сохранися. Многая лета
память твоя забвена бысть, но Христос тя яко
светильник на свещницу постави, да мрак мира
сего озариши. Мы же Господа прославим
песнью: Аллилуиа.

Икос 8

Всяк возраст стар и млад прослави тя, отче
Иоанне, егда обретешся нетленное телесе твое и
многая знамения и чудеса совершашася,
болящии исцеляшеся, слепые прозреваша,
хромии хождаше. Мы же, видяще в тебе

источник исцелений, со слезами воспеваем ти
сице:

Радуйся, пресвитерами славно обретенный,
Радуйся, народом православным почитаемый.
Радуйся, слепым прозрение подающий,
Радуйся, хромым исцеливый.
Радуйся, расслабленных жилами укрепивый,
Радуйся, токи крове остановивый.
Радуйся, отчаянных во врачевании не
оставивый,
Радуйся, в скорбех душу мою утешивый.
Радуйся, Иоанне пресвитере, чудотворче и
целителю.

Кондак 9

Всех приходящих ко гробу твоему не
оставляеши, коемуждо на пользу души подаеши
и Господа умоляеши: да пришедшии к тебе в
скорбех и печалех истощенни не отыдут, но
источник утешения в тебе обретут, Спасу душ
наших воззовут: Аллилуиа.

Икос 9

Ветии богохвальнии не возмогут достойно
восхвалити пучину чудес, чрез тя Богом
явленную. В видениях сонних являешися и веру
слабоверных укрепляеши, да с радостию и
надеждою ко гробу твоему притекают и сердцем

чистым тебе зовут:

Радуйся, яко вера православная тобою
укрепится,

Радуйся, яко любовь тобою умножится.

Радуйся, яко надежда наша оправдася,

Радуйся, крине райскаго прозябения.

Радуйся, кимвале восклицания,

Радуйся, гусли сладкозвучные.

Радуйся, ковчеже позлащенный,

Радуйся, камению драгоценный.

Радуйся, Иоанне пресвитере, чудотворче и
целителю.

Кондак 10

Свет чудес новых излия Господь Вседержитель,
егда бысть обретение нетленного телесе твоего.
Дивный огонь от иконы Царицы Небесныя на
гроб твой изыде, мы же, видевше славная
чудеса сия, верою окрепшею Отца Небеснаго
прославиша: Аллилуиа.

Икос 10

Светоподатель Господь, желая спасения всякой
плоти человеческой, пророки и апостолы на
проповедь посылая, мученики и святители
венцем нетленным венчая. Тако и ты, отче наш
Иоанне, с преподобными в лике праведных
прослави, а нас научи тебе воспевати:

Радуйся, добрая ветвь винограда Христова,
Радуйся, лозо многоплодовитая.
Радуйся, верныя ко Христу приведи,
Радуйся, заблудшия неотринувый.
Радуйся, мног плод духовный о Христе
сотворивый,
Радуйся, путь спасения нам указавый.
Радуйся, яко же и сам ко Христу путем тесным
следовавый,
Радуйся, яко и нас на стезю правды
наставивый.
Радуйся, Иоанне пресвитере, чудотворче и
целителю.

Кондак 11

Пение хвалебное приносят ти, отче праведне
Иоанне, обретшии спасение твоими молитвами
от бед и скорбей и всяких напастей, да купно с
тобою радостно поют Богу: Аллилуиа.

Икос 11

Светозарным светом бысть житие твое, отче
праведне Иоанне. Да и нам грешным путь ко
спасению указуя, зарю общего воскресения
предвозвещаая, маловерныя уверяя, верныя
подкрепляя, темже купно да зовем ти:
Радуйся, пастырю наш вселюбимый,
Радуйся, защитниче наш от врагов спасения

непреоборимый.

Радуйся, козни диавольския молитвою
победивый,

Радуйся, Христа житием твоим прославивый.

Радуйся, Богородицы избранниче неложный,

Радуйся, сослужения Ангельского удостоивыйся.

Радуйся, в сонях на молитву к ходатайству
твоему призывай,

Радуйся, яко и мене грешнаго Благодати Божия
не лишивый.

Радуйся, Иоанне пресвитере, чудотворче и
целителю.

Кондак 12

Благодать свыше ниспосли всем нам,
притекающим с любовью к раце мощей твоих, и
испроси у Господа прощение согрешений
наших, болящим же и страждущим исцеление
даруй, да благодарственно вси вопием дивному
во святых Богу: Аллилуиа.

Икос 12

Житие твое славно Господь прослави, человека
небеснаго и ангела земнаго нам показавый. Мы
же, ведуще многая знамения у гроба твоего
происходяща, молим тя, отче наш Иоанне, да
твоими молитвами укрепится в нас вера
православная, в ней же наше спасение, и тебе

мы поем восхваление:

Радуйся, фимиам кадильный Богу принесший,
Радуйся, во иереях ему послуживый.

Радуйся, тайнозрителю Божия благодати,
Радуйся, покровителю сирот и вдов.

Радуйся, ересей искоренителю,
Радуйся, правая веры насадителю.

Радуйся, яко тобою Господь прославися,
Радуйся, яко тобою Вера Православная
утвердися.

Радуйся, Иоанне пресвитере, чудотворче и
целителю.

Кондак 13

О преблагий угодниче Божий, святой
праведный отче наш Иоанне, прими сие малое
моление наше аще недостойне тебе приносимое,
но с любовью сыновнею припадающе вопием ти:
избави нас от недуга душевнаго и болезни
телесныя, да и мы в покаянии плод добр
Господеви принесем и с тобою в Царствии
Небеснем Ему воззовем: Аллилуиа.

(Сей Кондак глаголи трижды. А по сем читается
Икос 1 и Кондак 1)



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО